

毘陵人品記

毘陵人品目八

國朝

蔣容

卞誼

李雲

子杲

顧復

李琨

王沂

華山

卜同

胡璉

周磨

繆昌

唐恒

呂白

尤弼

白圻

莫驄

張愷

子琳

胡孝

吳儼

萬盛

邵實

白坊

王珀

胡華

華津

潘緒

子符

談書

吳鳳

吳汝憲

徐紘

高璣

唐貴

顧冶

楊文

羅柔

秦金

陳策

錢榮

邵經

華景

湯沐

貢安甫

黃昭史良佐

杭淮

徐問

王奎

惲巍

朱絃

徐淮

錢輔

嚴朔

談縉

邵天和

秦用中

張九方

錢文

子百川

周金

丁致祥

孫輔

胡忠

唐瑤

周衝

顧彥夫

周之禧

毘陵人品記卷八

國朝

蔣容字德夫武進人成化壬辰進士知潞州藩府軍  
校恣橫容不少貸王奏徵詣闕潞民隨之訟寃者  
二千餘人容竟得白改潼川州與中涓忤事多掣  
肘遂謝官歸囊有餘俸均分子姪先世所遺田廬  
悉讓兩弟鄉人義之

卞誼字寅之武進人成化壬辰進士爲人蘭清玉潔  
眉目如畫父嘗以誼被繫誼方幼日躬操飲食進

之獄家人請代弗聽初授兵部主事以使事經齊魯適大旱疫感疾卒發其篋得疏一通言東方水利荒政甚悉衆咸悲之

李震字時亨宜興人成化壬辰進士任兵部主事子杲字孟寅亦舉進士授南吏部主事震慎重善啟後進杲方嚴勤敏志于古學父子官俱不顯而卒士論惜之

顧復字德中靖江人事母至孝成化間以貢士赴銓歸省母母強之銓竟以念母死死之日母夢聞哭

聲驚曰噫吾兒死矣以復衣冠置柩上每母慟則  
躍起覆地

李琨字德嘉江陰人成化乙未進士拜御史按山東  
兩廣風裁凜然臺臣有冒寵納賄者琨劾免之直  
聲愈震尋卒

王沂字希曾僉之子成化乙未進士授禮部主事定  
錫予四夷重輕之則著爲令 憲廟山陵廟祔遷  
祔之儀多沂草定累遷副都御史巡撫真定裁革  
苛歛貧困甦息增葺大同諸處關隘寇不敢犯卒

於官沂端方剛介在官三十年持身如一日母吳  
溺歿北河沂在髫年哀號如不能生每舟過溺所  
輒慟幾絕所得恩蔭以移其姪其孝友蓋天性云  
華山字仁甫無錫人忠朴醇謹平居恂恂而遇事抗  
直不撓舉成化乙未進士知許州有王食事子爲  
大司馬嬖怙勢殺人法當死上官欲曲全之山免  
冠額天卒寘之法許隣 徼藩奸民以地獻山堅  
執不予陞兵部郎中出爲湖廣叅議適楚歲饑發  
粟賑施不待報可居二年乞致仕歸華爲無錫右

姓其成進士自山始貴而能貧亦莫山若也

卜同字從大宜興人成化乙未進士授刑部主事累官湖廣僉憲嘗偕僚友宴集黃鶴樓憲長屬爲賦尊俎間摘千餘言出如泉湧滿座奇之

胡璉字公器宜興人質直好義勵志經學嘗建議革淫祠復岳武穆衛將軍廟增祀吳師古邵材錢卽於鄉賢由舉人任新城令陞福寧知州改知歸州所至愛民慎職有古循吏之風焉

周磨字克禮武進人成化戊戌進士任江西萬載以

剛直忤郡守調福建永春除豪強清逋賦決淹獄  
擒巨盜民甚德之歲除齋居庭下忽蛙鳴逐之復  
至層嘿念曰未蟄而鳴其有寃乎因起隨蛙鳴所  
之至於馬道傍有井蛙因投焉掘得枯骨有釘貫  
其頂悉心推求始得主名寘之法邑人稱快爲作  
青蛙記陞太僕丞卒于官

繆昌字廷謨無錫人成化戊戌進士授工部主事奉  
敕勘勢家地還民民立生祠于武清出爲山西叅  
議遷守遼海歲饑議以平價糶粟于軍秋收糶粟

補官萬口稱便擢四川布政使尋卒昌性寬行和  
遇事若不欲忤人意於理或違則崇高不阿人有  
不善未嘗斥言但正色對之而人默改庶幾恂恂  
君子云

唐恒字公常無錫人幼喪父哀毀骨立奉母周甚孝  
適大雨裂龍山麓水衝父塚恒負土填壅不克又  
貧不能遷無何喪母母屬纊謂曰塚陸沉奈何恒  
痛母言卽以鐵鎖繫項仰天誓曰恒不徙墓不去  
此鎖懷憤六年病革親友爭爲脫之恒捫鎖淚下

曰吾解此無以見吾母子地下竟抱鎖成是後山水漸殺墓得不傾巡按御史東郊祭其墓

呂由字宜中無錫人成化辛丑進士釋褐大名府推官轉衢州永平拜監察御史爲人簡易端確不事生產妻子交謫浩然不顧也由欲爲其子元夫乞婚邑中巨室莫有願者已而元夫亦舉丙辰進士累官南京通政使

尤弼無錫人成化癸卯鄉舉爲蒼梧令果介自信嘗七疏西南邊務多見施行四宰劇邑竟爲要人所

逐居家貧甚以壽終

白圻字輔之武進人康敏公仲子年十八舉成化甲辰進士賜歸娶授南京戶部主事累陞副都御史總督南京倉儲先是察浙藩有希權貴意請開銀礦者圻列其利害議歲輸代課公私稱便爲山東布政中涓有進香泰山者挾邀重賄圻婉謝不應尹應天時申飭康敏所定役法仍條上便宜七事皆切時弊查核倉儲宿蠹一請以內艱歸卒于家莫驄字曰良無錫人成化甲辰進士授工部主事議

建濟寧石聞歲省費數萬至今賴之有闕筆殺委  
官疏寘之法權貴歛戢改兵部車駕郎興藩之國  
索車千兩總損其半爲內侍所訴有 詔械繫旋  
釋歸卒年四十七驄有至行少孤鞠於季父慶終  
身父事之母費安人嗜笋驄從外父官汝寧其地  
笋艮市之歸而母已逝終身不忍食笋

張愷字元之無錫人成化甲辰進士官兵刑二部主  
事爲中貴楊鵬所羅織左遷順德通判歷東平知  
州會大璫李興治水張秋所至笞辱長吏吏亦走

饋遺恐後愷徒手謁之大璫知愷廉無所問更加  
敬重擢守黎平諸苗感化卒見黜于逆瑾以其勁  
節終不屈也瑾誅薦除山西太原知府陞福建都  
轉運使以疾歸行李蕭然愷清峭壁立人不敢以  
一介溷之居家三十餘年擁書閉戶屏跡公府嘗  
有盜夜入其室發篋空無所得嗟嘆而去子琳篤  
學有孝行嘗持金市繪遇所親以通稅受繫卽爲  
代輸說者方諸麥舟之義云

胡孝字企參宜興人成化甲辰進士累官知府家至

貧篤於孝友父申爲濮州學正性嚴毅每誦責孝  
必愉顏婉色以受之父卒于官孝徒步奔喪慟絕  
始蘇恩愛群弟感之如父

吳儼字克溫宜興人操勵清慎居鄉有士行舉成化  
丁未進士以庶吉士授編修久之遷侍讀學士逆  
瑾欲與交權不應因摘其試士題爲罪坐黜瑾誅  
復起南學士陞南京禮部尚書武宗北幸偕府  
部大臣極諫其秉經議禮多合古意卒謚文肅  
萬盛字吳夫宜興人由歲薦授九江府推官以公廉

自矢辨釋要囚十餘皆畫像祀之人有過無貴賤  
面折不容端方剛直爲儕輩所重年未六十乞休  
八十有三卒

邵寶字國賢無錫人生而質直年十八問學于莊定  
山先生舉成化甲辰進士知汝州以禮讓爲治入  
爲戶部郎歷陞副使提學江西以身爲教士習不  
變宸濠索題咏皆却之後濠敗人服其先見累陞  
副都御史總督漕運劉瑾怒平江伯陳熊欲論殺  
之饋寶千金俾効熊寶拒不納瑾怒勒致仕瑾誅

起巡撫貴州陞戶部侍郎以母老乞終養久之陞  
南京禮部尚書嘉靖初復申前命俱以母病辭特  
詔予終養一日晨起謁先聖及家廟既退端坐而  
逝謚文莊賢志行端介踐履篤實一切聲色貨利  
嬉遊無益之事絕口不言蕭然環堵閤然自修學  
者稱爲二泉先生嘗曰願爲眞士夫不可爲假道  
學世以爲名言

白坊武進人昂季子領成化丙午鄉薦授兵部司務  
轉吏部雖世家子而謙厚自持與寒士齒退朝理

堂事退堂則闔戶讀書日有課程家居時見族有貧乏者輒衣食之

王珀字廷瑞武進人成化丁未進士授御史巡南城中涓貴戚一時肅然有嫉之者謫睢州判官改知都昌陞瑞州同知南雄知府卒于官睢有二兇陰結大盜其跡甚秘珀伺而擒之都昌有讐家殺人匿其屍珀鞠而置之法南雄有權場漢番諸貨所聚權充公帑守土者率以墨敗珀無所染珀貌嚴肅論議有條遇大事決大疑他人所難者珀處之

裕如其材有過人者矣

胡華字惟峻武進人成化丁未進士授行人選御史  
初按京師搏擊不避權貴按閩獄多疑滯因感異  
夢剖斷中情人以爲神陞廣東副使先是以清牧  
馬草場忤權貴其人挾逆瑾焰自廣逮華至京  
詔獄罪且不測卒得理還職累陞廣東布政使以  
母憂歸數年卒

華津字濟之無錫人成化丁未進士令松滋陞刑部  
主事改戶部監通州倉剔弊除奸不避中貴時逆

瑾用事公卿多趨媚之津獨長揖衆慮禍叵測及  
津至見瑾于左順門瑾第謂之曰華先生來何遲  
盍徃事事竟莫能害累陞山西右叅政卒于官

潘緒字繼芳無錫人好讀書能詩秦貞靜開吟社於  
惠山結十老會時緒方壯貞靜招之或疑年少貞  
靜曰古不有忘年交乎旣入社衆皆稱敏性篤孝  
痛父蚤世每上塚輒爲泣下母性嗜棗遇嘉棗必  
懷歸家世儒醫暇取靈樞素難諸書誦繹之曰此  
吾家舊業不忍棄也遂以醫名子符亦稱博洽

談書字子虞宜興人家貧事母至孝歲資館修以贍菽水母歿每食必奠終其身爲諸生繩趨尺步言簡行恭士林重之

吳鳳江陰人家食貧賣錫爲業晨出必鬻一餅納諸懷中歸以遺母又嘗貨骨簪雜物以給養有一惡少虐取之鳳不爲較或曰何懦也鳳曰設吾較之詈及父母其辱何如母亡丐貸以歛蚤夜傭作以償之旣葬每夙興拜墓下進餅食如初伐樹枝爲屋棲號墓側歷十二寒暑不變詔旌之

吳汝憲字道卿無錫人朴茂方正言笑不苟邵文莊  
見而奇之以女歸焉補邑庠生以文不投時見黜  
文莊言於督學復之汝憲不屑也遂屏去青衿以  
皂帽常服終其身兄嘗以事繫獄汝憲亦自囚一  
室籍草食糲一如獄中人勸之輒泣其兄得釋而  
後出其治家嚴而不苛訓子姓惟務孝弟勤儉以  
古先賢爲楷與人交洞徹肺腑存心不欺無愧  
屋漏年七十五而卒友人私謚曰貞簡

徐絃字朝文武進人弘治庚戌進士由刑部主事陞

廣東按察司僉事時白沙先生講聖賢之學絃首  
式其廬建周元公書院嶺南地連山海吏多不檢  
絃發摘奸伏墨吏多望風解綬去陞雲南副使卒  
于官

高機字舜之武進人少喜讀書尤邃心理學論學必  
主繕修說理必本洛閩于伊川紫陽二先生擇其  
要語繕寫成帙時時玩繹體驗于事親從兄間確  
乎以繩墨自守家故貧處之裕如嘗有詩曰幹蠱  
與才子言貧是乞兒孔門多樂地殫力任耕犁

治間 詔舉經明行修之士邑人交薦之辭以親  
老不就郡守敦請爲鄉飲賓亦不赴卒祀鄉賢祠  
中以布衣祀者惟謝應芳朱昱與璣三人而已

唐貴字用思武進人家食貧無以爲養至手錄時藝  
售之以贍父母登弘治庚戌進士授戶科給事中  
寄語諸第以權利爲戒奉 敕稽覈兩廣倉庾諸  
逋悉清民亦稱便比其歸名香珍藥一無所携不  
久卒

顧治字世叔無錫人少長紛華心厭之避而之溧之

吳時時寄居禪宮道院敝衣破屨率意去來對人  
非故知不出一語性甚孝居親喪哀毀廬墓癯然  
骨立能文詞所著有夢言五億九居士傳

楊文字宗周無錫人少嗜學躬耕自給自諸生爲進  
士凡業三經靡不精治司教金華上治道八事入  
爲國子監丞應詔陳言深切時弊監有膳餘若干  
主者分致拒不受未幾遷長史引疾歸學者稱爲  
淡成先生

羅柔字文微無錫人弘治庚戌進士爲戶部郎出納

明允擢守建寧時流賊旁掠人情汹汹柔挺身搏  
之賊由他道去爲吏耻事逢迎有貴人督過飄然  
拂衣歸入官廿載歸囊如洗徜徉湖山寄情詩酒  
貴而能貧貧而能樂柔兼有之

秦金字國聲無錫人弘治癸丑進士授戶部主事中  
官外戚競乞鹽引金執奏止之督學河南行部至  
封丘流賊奄至逆破之于陳橋歷官副都御史巡  
撫湖廣擒斬賀璋廖琪討平彬桂及香爐山諸苗  
時中官傳旨索鯉魚秧督責嚴峻金疏言不可

事遂寢 武廟南征權幸橫索金抗辭直奏以一身當之民賴不擾嘉靖初入爲戶部侍郎尋陞尚書 興獻太后上尊號曰章聖吏部侍郎何孟春等爭之 上問倡者爲誰孟春言臣與尚書秦金等仰戴高深欲效涓埃之助心惟一理口實一辭無庸於倡旣而 冊文頒示金與孟春等俱不起行禮 上切責會例自陳詔聽其歸後以薦起南京戶部尚書尋改工部以引年再疏得請卒謚端敏金志在經濟而守之以正居常恂恂樂易及當

職守毫髮不可奪獎善覆惡薦寵後進人稱長者  
云

陳策字嘉言無錫人少孝友弘治癸丑進士授戶部  
主事遷員外郎中出守饒州值盜發桃源洞單騎  
入巢諭降之以洞僻遠奏建萬年縣治縣爲立祠  
尋擢福建叅政時汀漳盜起策殲其渠魁蘇世浩  
餘黨悉降擢江西左布政值宸濠亂後撫綏荆瘵  
民賴以安策平居任直不立畦岸及當大事經畫  
周密動中機宜未幾致政歸卒

錢榮字世恩無錫人弘治癸丑進士爲戶部郎以介  
執著聲 武廟駕自南郊還百官迎道左邏者忽  
執榮下詔獄訊鞫無所得乃免時逆瑾亂政榮三  
疏乞歸養家居數年不入城府恂恂文雅人稱長  
者其居官大節又凜不可犯云

邵經字孔述江陰人以鄉舉守潞州桑梓蔭城二鎮  
負固相攻官兵不能制經單車徒步收之濬濬暴  
橫繩以法一無所徇有奸黨十餘輩匿 濬府率  
吏卒入捕之因檢 王不法數十事抗章列奏

王亦誣以試題犯 上下詔獄窮治無所得釋之  
既歸貧甚杜門自守邑令饋之灘田謝不受

華泉字文光無錫人弘治丙辰進士選庶吉士爲戶  
科給事中上疏以正君心肅紀綱精選舉杜私門  
爲首務至論天下之財聚於大臣大臣之財聚於  
內宦人皆傳誦已未劾考官程敏政擬臬外補  
孝廟親定南京太僕主簿至浹免馬價後輸之罰  
斥屬官常例之饋轉寺丞出守韶州清操益勵陞  
四川叅政鎮守內臣饋金鉸扇百握對使者焚之

復以重寶琕泉欲市茶西番泉峻却不許遷福建  
布政江彬用事部曲四出索貨于藩臬獨憚泉威  
名不敢肆 世宗登極奉表入賀還卒于家

湯沐字新之江陰人弘治丙辰進士授崇德令擢御  
史按三晉時逆瑾擅政爲其私人道地沐不可遂  
出爲湖廣僉事尋謫武義令瑾敗以原官督廣東  
鹽政遷福建副使累遷大理值欽明大獄起 上  
意有所嚮沐昌言不敢縱舍傷平明之理竟免官  
廷臣交薦不報沐性嚴整閭門之內肅如朝典見

鄉曲後進車蓋至其門故偃蹇不出出則自踞上  
坐以折其氣有善當獎借則又津津未嘗置也與  
父老故人班坐痛飲如微時能使忘其貴生平廉  
潔自喜饋遺皆屏絕故居官三十餘載門第冷落  
僅有竹莊數畝而已學者稱爲沂樂先生

貢安甫字克仁江陰人弘治丙辰進士爲長垣令擢  
御史時壽寧侯張鶴齡怙寵驕甚安甫抗章劾之  
壽寧銜之切骨賴 孝宗神聖弗罪也 武宗嗣  
位考功楊子器以山陵事下 詔獄安甫疏救共

部劉大夏請老歸安甫疏留時論韙之逆瑾擅政  
相臣劉健謝遷相繼引去安甫草疏約同臺力爭  
瑾怒矯旨逮訊鎮撫司旋收錦衣獄久之廷杖  
三十發編戶歸家闔門不入城市瑾誅詔還官  
屢推不起再以薦起山東僉事不三月引疾歸安  
甫性負骨鯁見正德中時事多不可意每裂眦出  
血呼呼不能已自念身在外臺不能補拾遂有浩  
然之志屢薦卒不起居家以孝友聞同時與黨藉  
者主事黃昭御史史良佐皆同邑人

杭淮字東卿宜興人弘治己未進士授刑部主事提  
學雲南故事沐府秋祀潘泉以朝命主祭翌日沐  
祀請陪淮曰昨君命當往今私祀何陪焉遂不往  
累官至中丞廉平明恕以志節聞牴牾當道遂解  
組歸倡詠于泉石者數年累推不起所著有雙溪  
集

徐問字用中武進人廉介好修弱冠登弘治壬戌進  
士除廣平府教官召爲刑部主事歷郎中值權倖  
縱橫問持法屹不能動出知登州調臨江以方畧

擒獲大盜數百人尋遷長蘆運使轉廣西叅政累  
遷廣東左布政適遣中使採珠不中程御史欲下  
令責諸賈問曰珠有禁不趣賈爲盜耶事得寢問  
亦坐是受部叅賴 天子聖明不問無何入覲以  
廉受上賞尋撫貴州夷俗獷悍喜相毒噬問建貴  
陽書院祀濂洛關閩諸賢群多士而訓誨之夷俗  
漸歸禮讓擒獨山土酋賜璽書褒勉尋陞兵部右  
侍郎自謂於學問未有豁然處因請告歸棲遲芳  
茂山下潛思力究凡十年起南京禮部侍郎進南

京戶部尚書甫數月復乞歸登第四十八年家無  
長物田不滿百又割以贍寡嫂其學以紫陽爲宗  
窮理致知爲入門敬義直方爲實際滌除習氣爲  
工夫恬退廉潔則其天性也所著有讀書劄記山  
堂萃稿卒謚莊裕

王奎字文明武進人弘治壬戌進士授行人選南道  
御史陞江西僉事在南道時有二重獄皆已誣服  
奎皆得實立爲平反江西德興尹貪墨奎將按之  
其人懷百金求貸奎怒斥之卒按其奸旣勦桃源

洞叛寇俘馘甚衆餘黨悉從撫諭民德之爲立生祠

惲魏字公甫武進人弘治壬戌進士由戶曹歷湖廣兵備副使嘗從王文成用兵在武昌計擒叛魁趙燧中丞毛伯溫薦以自代閹瑾索賂不遂削其功罷歸所著有東麓存稿

朱絃字廷和無錫人弘治壬戌進士知臨海縣擢御史出按貴州貴士俱就試雲南絃請兩省分試詔從之以抗直摘判福寧轉長泰民爲建祠累陞

雲南府同知代府長史致仕

徐淮無錫人以貢爲上高訓導贄物一無所問貧者顧有資焉三檄之署縣皆辭母病乞致仕御史重其去淮固請而歸邵文莊爲之志

錢黼武進人以貢選冀州判官主辦內府薪炭時權奸挾勢乾沒主者率徵禁被害黼棄官歸爲人剛直人有過必面折之先與吳學士仁夫輩立社講學至是與邑中士大夫家居者相追隨黼歸最先年又最高士大夫皆推尊之贈以詩歌題其卷曰

高尚

嚴朔無錫人少失母依祖母周以育祖母病夜輒焚香額天求代祖母尋愈人皆稱其孝祖產不及中人其兄意在兼收朔甘以教授養母一毫無所析人皆稱其悌竟以貧老

談縉字朝章無錫人蚤歲卽厭章句留心聖賢之學謂不離言動倫物者是兢兢冥力焉每臺使者行部必謁其廬所著荷橋子皆篤實力行語也

天和字節夫宜興人珪之子正德乙丑進士由庶

吉士授吏科給事中劉瑾擅權屢差勘問外官旋  
差查盤河東鹽課俱無所賄瑾銜之謫判曹州復  
職御史劾其受平陽府饋捏旨削籍瑾誅事白  
晉符永歷陞雲南副使所至以清白稱卒于官  
秦用中字擇之無錫人生而穎異日記千言長攻古  
文詞以貢歷官泰順教諭自免歸才望重于一時  
與莊定山李空同諸公倡和有西湖浙游二集  
張九方字應皋無錫人領鄉薦授汝寧推官不畏強  
禦嘗路忌之棄官歸售文自養買舟名浮莊往來

梁溪之上娛情泉石積月忘返有覆簣歸田等集  
錢文字章靖無錫人生稟異質爲邑諸生累舉不第  
刻意於詩所著有希齋詩子百川字東之亦能詩  
所著有寒齋稿

周金字子庚武進人正德戊辰進士拜給事中陞太  
僕少卿都御史爲人警敏濶達不爲拘謏詭激都  
督馬昂納女弟于後宮跡疑李園金請誅昂而黜  
其女女竟黜凡軍國要機金陳利害悉中機宜如  
議狼山擒寇功及復哈密事者以數言而定先是

寧夏甘肅相繼告變帥臣多懷危懼金至開誠信  
用寬簡以收士心大同殺撫臣宣府圍帥府幾于  
激變金皆從容諭以利害衆歡然叩首而退金之  
應機定變類如此家居八年起撫保定總淮漕會  
章聖梓宮南祔諸護行者畏江險將從陸金力諍  
山險甚于江卒由江行如期而葬沿江千里皆受  
其德官至南京戶部尚書

丁致祥字原德武進人年幾五十始以儒士舉登正  
德戊辰進士授戶部主事漕舟自江達淮途中多

清江祥督漕議復儀真廢閘歲省費數萬運以通  
達累陞河南布政司叅政以老乞致仕歷官三十  
餘年囊無長物惟題詠篇什甚富孫輔落拓不羈  
亦有文名

胡忠字企周宜興人正德戊辰進士授戶部主事爲  
人不修邊幅入官儉素一如寒士累陞廣西叅政  
會劇賊王鏐土官岑猛負固戕殺守臣勢甚猖獗  
忠攬轡就道七日王鏐就擒岑猛遁匿廣西平擢  
都察院副都御史鎮守延綏致仕

唐瑤字國秀貴之子由鄉舉選信陽知州累官永州  
知府居官以惜民財重民命正風俗爲急信當孔  
道裁革煩費永多客戶富室有孀則客戶強納爲  
室瑤斃其一二魁傑孀始得安自以不能事父養  
母痛心恨慕取詩有懷二人之義以自號信陽諸  
生有制終廬墓者造其廬永州屬吏有母年八十  
以離憂剪髮寄者其人居官如常力請黜之其篤  
厚正直欲人同歸于善類如此先世遺田三百畝  
屋一區歷官四十餘年無所增益鄉人稱之無異

辭云

周衝字道通宜興人韶年以孝聞雖甚暑至母榻不敢裸體稍長從仲兄衢授尚書篤志于學正德庚午領鄉薦司訓萬安擢應城令以德化民民爲立生祠以耳疾改邵武教授尋遷唐府紀善王世子以讒間衝動以至情王感悟愛世子如初久之聞母訃一痛而絕學者稱爲靜菴先生

顧彥夫字承美無錫人正德庚午鄉薦授太常寺典簿累任寧波府同知所至以廉能稱署慈谿縣篆

民爲立生祠及清清堂俸餘悉以給親族卒之日  
貧無以殮

周之禧字子敬靜菴公從孫嘉靖乙卯舉人爲太康  
令生平不識機心械事性鯁直不善諧俗落職還  
里與相知爲真率會談學砥行人謂靜菴公不亡  
云孫延儒萬曆癸丑會試廷試俱第一

毘陵人品記卷八

人品記 卷八

昆陵人品目九

國朝

毛憲

孫中孟

葉夔

子金

蔣亨

龔大有

吳閻

吳仕

梁榦

臧宗善

胡憲言

蔣同仁

喻義

顧可久

周振

呂朋

吳玘

蔣舜民

吳仲

楊淮

華鑰

曹珂

子景賜  
孫司宰

陳燮

曹卿

孫鑾

龔大稔

惲金

張袞

浦瑾

子應元

朱得之

弟庶

劉乾

人

目九

蔡金

孫敬夫

陳周

子鳳

徐玩

萬吉

程飛卿

董紹

子士弘

侯祖德

唐音

子馨

丘登

唐順之

黃正色

張選

王表

子立道

薛甲

薛南

吳元

潘松

周仕

段鏞

俞紹祖

祖鎧

王忱

陶澤

薛應旂

子近

吳性

蔡元銳

弟元鐸

蒲劭

弟濤

陳阿皮

高材

王問

萬士亨

萬士和

周豁

華雲

毘陵人品記卷九

國朝

毛憲字式之武進人自幼性端重寡言中正德辛未進士拜給事中疏論大臣怙勢爲姦利者數人內外肅然武廟西狩儲嗣未建舉朝諱不敢言憲獨懇疏不報比回鑾有彩幣賜近臣憲疏辭不受因謝病歸與同志講求理學學者多尊師之稱爲古菴先生憲立身治家悉有規格歲時祭祀一遵家禮置義田以贍三族與人交情義懇至于外

生患難尤篤所著有諫垣草古菴文集毘陵正學  
編人品記孫中孟歲薦司訓孝友伉直有祖風

葉夔字司韶武進人力學好古甘貧守正正德末歲  
貢京師值武廟南幸貽詩以諷當事授汝陽司  
訓世廟登極議大禮夔亦有繼統不繼嗣之說  
永嘉聞之走書邀夔夔笑不應會繼母年高乞歸  
當事不允夔投牒而去宋末死事諸臣未秩祀典  
奏記當路建祠祀之慕謝子蘭之賢作景賢錄其  
其墓爲置祀田嘆人心不古自號志心已復號存

齋病革猶手書謝上蔡人能操無欲上之心數  
語云此心學之要也子金以乙科官別駕亦有父  
風

蔣亨字元貞武進人正德辛未進士爲南臺御史

武廟北巡亨抗章請回鑾建儲甚切三上皆不

報庚辰駕南幸駐留都伏行在以死爭人咸危

之亨弗爲動陞河南按察司僉事忤時貴遂謝事

歸亨以風節自持沉靜端毅謹守先業一無增飭

其清白尤罕儼云

龔大有字士謙武進人正德辛未進士令廣平清內  
監奸胥之蠹選南京御史值宸濠之變車駕南  
巡復將東下人情惶懼臺諫將具請回鑾一御史  
當爲首胸縮畏禍大有銳然具疏上之不報旣而  
論吏部尚書喬宇頗著直聲後中以考功法請以  
原職致仕

吳閏字朝言武進人正德辛未進士授行人選監察  
御史慷慨論事選司通關節閏劾去四人都御史  
陳金謀復入院閏率全臺劾止之又數論奸邪蠹

政歷數錢寧谷大用等之罪值考課有讎間者嗾御史王琳誣奏間附錢寧免官曾不察間之累劾寧奸也

吳仕字克學宜興人爲人剛重有廉隅正德丁卯鄉試第一登甲戌進士授戶部主事改禮部歷山西福建廣西河南四省督學設科條抑徼倖評薦文藝衡鑑甚明偶有忤于當事輒引疾去門鮮俗賓與二三高賢觴咏于石亭林泉間陶然樂也

梁幹武進人正德丁卯舉于鄉仕湖廣竟陵知縣平

生方正自持後進復之海多所成就居官以廉能  
稱祀名宦見竟陵縣志

臧宗善武進人自少攻苦食淡以清節自勵貢爲扶  
溝訓導乞歸受徒講學餽粥不給裕如也

胡憲言宜興人以貢授合浦縣丞居官廉介不苟郡  
守張獻負海內望顧獨重之令數如毀不爲動俄  
令以墨敗守將廉其邸令陰索寄憲言憲言爲護  
還之封識宛然令始悔泣守因屬憲言攝令固辭  
遂乞休致仕

蔣同仁字公甫武進人正德甲戌進士官奉正嘉靖  
初詔按閩獄多平反癸未議大禮伏闕受杖幾  
死久之陞叅議歸杜門却掃偶郡守過訪魚服出  
迎啜茗相對旋即避居漏湖雖親黨不見其面  
喻義字宜之無錫人正德甲戌進士授戶部主事累  
陞武昌知府甫八月丁憂當路廉其清白令有司  
賻之一無所受服闋補廣西南寧時中州二酋爭  
立舉兵相攻義往諭以利害酋即帖服在任幾三  
考爲同寅檄舉遂疏歸居鄉以淳樸稱

顧可久字與新無錫人正德甲戌選上授行人時

武廟將南狩可久疏諫下詔獄杖之世廟卽

位首錄諫臣拜戶部員外郎值獻廟議起可久

復上疏諫復杖之出守泉州擢廣東副使行部瓊

海纂山海圖說亡何尙黎出叔按圖窮治境內帖

然祇落職杜門却掃屏迹公庭性善吟咏有溫陵

虔州珠崖在澗諸集

周振武進人正德丙子鄉薦後令餘干以興學善俗

爲首務會歲稔出巡阡陌宣課濟再令天台有

橋當要道隨造隨圯振以石柱爲之屹不動人皆  
利涉以振晉陵人名晉陵橋前後爲縣八年俸入  
悉代貧民輸負曩饑餉缺兩縣民立祠祀之陞雲  
南巨津知州未及引年而退性最孝事兄如父聞  
兄謦欬雖在別室必起立振一子兄五子析箸爲  
六尤人所難也

呂朋字志同武進人中正德丙子鄉試歷官廣東市  
舶司提舉爲人廉潔恬靜一介不取歷官幾二十  
年家不增一椽一櫬受旌薦者十餘章終回翔州

縣允散之秩而已

吳玘宜興人正德丙子江西有寇僭號稱亂勢甚猖獗玘時爲贛縣士薄勇於赴闕遇害事聞贈知縣錄其子入太學

蔣舜民字虞仲江陰人正德丁丑進士初任新豐有惠政其所創均田之制至今戴之累陞浙江僉事生平不喜曲事上官及與物接驩如也

吳仲字亞夫武進人正德丁丑進士令江山召爲監察御史劾武定侯郭勛不避權惡主議將通惠

河竟底績戶部歲省運錢十二萬緡今河上有吳公祠

楊淮字東川無錫人正德丁丑進士授戶部主事監出納與中官共事釐革積弊在庫自一茗外悉爲峻却嘉靖初將升與獻主於廟淮抗疏力諍衰經執杖號慟闕下上震怒執送詔獄杖于廷時同邑兵部郎中華鑰亦同被杖而淮竟病創死年才三十八隆慶改元贈太常少卿

曹珂字國用宜興人古貌古心有隱行舉正德乙卯

鍾孝二親通顯禮闈不復應舉曰吾早年不能祿  
養今豈可以祿自養耶末年進授都察院都事卒  
子景暘字子升爲人端慤舉嘉靖乙卯知金州丞  
西安有古循吏風孫司宰字伯卿舉隆慶丁卯令  
肥鄉潔已愛民官至南京刑部郎中蓋不愧其祖  
父云

陳燮武進人素樸交寡諧非其人不友少與葉司韶  
毛式之輩結社講學深究弗怠爲人樸直剛介好  
惡甚嚴以貢上春官自以爲老竟拂衣歸

曹卿武進人正德乙卯舉人以親老就選授温州府學訓導陞樂清知縣蒞事公勤御史嚴飭尤廉介不苟取邑有巨猾莫敢誰何卿卒致之法一邑稱快以憂歸貧無以給也服闋赴部卒于途

孫鑾字朝望武進人正德辛巳進士授刑部主事出慮楚囚多所平反守漢中修堰溉田民獲有秋化墨吏逮貪帥人皆帖服曾有銜之者左遷澉江抑豪祛弊爲之益力陞雲南副使括羨賦節浮費陞山西行太僕寺卿歸鄉人或侮之悉不校人謂其

居官以剛介著居鄉以長厚稱而廉儉之操則進退如一云

龔大稔字士登武進人正德辛巳進士授戶部主事陞廣東僉事吏部尚書方獻夫家居侵奪鹽利籠絡貨權虐事霍輜以剛狠翼之受獻夫人有司不敢問大稔抗疏數其罪會方霍皆召入誣以他事勒致仕行至中途復有旨逮訊杖闕下黜爲民憚金帛器之武進人正德辛巳進士初知安陸州復除均州擢南戶部郎調吏部出守溫州其在安陸

也 獻陵更制董役者皆中官金御之以禮法不  
敢恣橫會歲饑發倉賑貸 上聞以酒勞焉亦異  
數也既守溫與永嘉忤典選者陰用計調成都溫  
人以十善頌之會金微有足疾遂稱篤不赴

張袞字補之江陰人正德辛巳進士選庶吉士改御  
史復召入翰林爲編修累陞侍讀學士掌南院太  
常卿掌監事以頒曆諸生失儀降南京光祿卿遂  
致仕歸袞在翰林十四年值 世廟稽古考文明  
大倫正大祀袞皆與議間有不合輒具奏聞未嘗

阿狗 上亦寵眷奉天殿成召袞入殿親授之敕  
無逸殿成又召袞賜宴幽風亭亦遭際之盛云先  
是議禮諸臣逮繫左右無敢申救袞獨上疏請釋  
久之獲解此又袞之風采最著者也性孝友所遺  
先業悉讓于兩弟居鄉循循名檢修江陰縣誌簡  
而有法

浦瑾字文玉無錫人博瞻有文登正德辛巳進士授  
麗水令尋卒子應元見父病劇日夜哭泣禱神請  
代竟不起遂自經以殉聞者哀之處州守黃體行

爲作孝子傳

劉乾靖江人初官戶部勤廉公明忤逆瑾逮繫不屈  
改武選釐正選格請託不行陞光祿寺卿陳言二  
事其一以勾稽往牒立條例慎出納其一以額辦  
煮醪歲輸費數萬請移北寺爲便 詔從之乞致  
仕卒賜葬祭

朱得之字本思靖江人從陽明先生游究良知之旨  
泊于榮利爲桐廬丞歸閉門讀書鬱有著述弟庶  
之丞東陽亦以長者稱

華金字子宣無錫人正德辛巳進士郎戶部不附權  
貴歷官天津副使不能屈節上官遂乞致仕金事  
父母甚孝待庶弟友愛平居無妄言謖行初舉于  
鄉例得免糧役金請受役如故既第例當入朝候  
疏取 旨送科他進士未瞑卽散去金于中夜猶  
莊坐以待俄而邊警至金猶候命 世廟以爲賢  
召至宮出上方供勞之太宰陸完夫人金之姑也  
金並官京師足不及其門完敗金爲恤其孤張孚  
敬驟貴用事金爲同榜邂逅于朝張曰華兄獨不

能與吾共事乎金正色曰公爲相當以天下爲度  
乃私其同年耶張慙而退家世雄于貲自金成進  
士產日挫諸孫析箸兄弟交讓鄉論美之有孫敬  
夫甘貧尚志竟以貧死

陳周字文美嘉定人徙居無錫正德辛巳進士授戶  
部督漕船奏蠲閩浙通稅周議欲開引鹽鹽商入  
賄以請周輒閉之曰引固欲開賄而開不可也遂  
出爲河南叅政行部得穴金檄致之庫代償負官  
租者汝民德之建却金亭周王侵民田周復之王

欲折辱周不爲屈王無以難居無何病卒子鳳能  
詩有隱操

徐玩字味道武進人少知檢束于儒先格言錄之成  
帙母歿父構危疾熟讀軒岐諸書起父于沉痾就  
養無方從兄弟六人視之如同胞撫孤嫻如子教  
二甥如孫恂恂樂易人未嘗見其疾言遽色至義  
利所在介然不淆有司以筆札召輒辭曰秀才若  
處女不當輕與有司接其自重如此旣以貢當就  
試禮部玩不赴曰吾父在吾出而歸稍後吾父倚

間矣奈何以旣衰遺體跋涉三千里博一官也自  
是深居簡出讀書教子于治家處世省心養身確  
有成規人皆稱之爲長者云

萬吉字克修宜與人爲人方嚴剛峻望而知其爲莊  
士平生以禮義廉耻自律事父母孝弟病與共寢  
食至老未嘗異錢帛吉面目清冷對人少寒溫語  
然久與之處真意溢出益如也學者咸尊事之稱  
古齋先生以貢爲桐廬訓導夙夜勸課深明義利  
之辨諸生皆知振拔未幾乞致仕歸

程飛卿靖江人能詩首宿肅然不喜干謁群偷入其  
室束之薦中猶毅然曰麴生我所嗜可勿將去

董紹字宗遠武進人嘉靖癸未進士爲人真率不尚  
修飾令新昌邑敝俗薄前令多以賄敗紹至悉繩  
以法亦嚴以自治邸中所需一切取辦于家人觀  
誤攜一銅缶行三百餘里叱還納之庫其廉慎如  
此子士弘亦登進士守興化有能名

侯祖德字繩武無錫人生而愿慤嘉靖初以太學生  
承浙之新昌擢尹江山以廉幹聞適吏部南海霍

公應召至京所在咨訪聞祖德賢擢太僕丞頃之以母老乞歸門庭簡寂出必徒行蕭然布衣也

唐音字希古武進人性獯介于義利大閑不待學而辨聞鄉先生毛古菴講學里中輒造其門魏莊渠先生談道于吳時音已領鄉薦當對公車竟謝不往赴吳受業讀書必反覆玩索推見古聖賢之心卽兩先生言未愜于心必明辯審思期于有得而後已就選廣平雞澤縣實心幹理未嘗以上官意指爲趨向學使者至廣平諭諸士曰諸生欲爲聖

醫學雞澤令卽是其見童如此後卒于官無以爲  
歛諸監司厚賻之其子一磨辭不受一磨字仁甫  
登嘉靖乙丑進士有邁往拔俗之韻雖不竟其用  
蓋無愧其家風云

丘鏊字朝洪武進人宋文定公密後性簡伉而才甚  
高視天下人多齷齪不可語視天下事率瑣尾不  
足爲爲古今文辭必人所不經道語年十二喪父  
與弟鏊廬墓三年年二十八登嘉靖戊子鄉書家  
日窘餒資羞脯以養又倣學醫俱以懶罷三上春

官不第棄去制義日坐小亭殘竹數竿遺編數帙  
環堵缺不治久之選山東靈陽教諭一切饋遺辭  
不受士甚德之不久病卒貧不能飲兵備史某贈  
之金乃克棺衾以歸唐中丞割田爲治墓乃克葬  
唐順之字應德珪之子弱冠舉嘉靖己丑省試第一  
楊公一清奇其才將魁廷試索所對策不應寘二  
甲授兵部主事丁內艱起補吏部尋改翰林編修  
時永嘉當國稱病求去勒令以主事致仕旣而簡  
宮僚起補春坊司諫與贊善羅洪先校書趙時春

疏請正

東宮朝觐忤

旨罷歸杜門謝客砥節

甚嚴日從山中游或趺坐竟日冬不爐夏不扇行  
不輿臥不裯衣不帛食不肉備嘗苦淡曰不如是  
不足以拔除欲根年垂五十恍然有得曰此心天  
機活潑自寂自感不容人力吾順此天機而已四  
方學者翕然尊師之稱爲荆川先生會倭入犯東  
南騷動有以邊材薦者起家兵部敕視餉鎮邊務  
復視師浙直有功陞太僕少卿尋擢撫淮陽驅馳  
南北竟以是病行至泰州自度不起進諸將士曰

歿國吾志也良歿舟中幸矣遂卒公材高意廣包  
絡今古於書無所不讀自六經諸子以至甲兵錢  
穀象緯曆象陰陽小技無不研究其文辭足以擅  
名一家所著有荆川集所輯有諸儒文要語要儒  
編左編右編文編稗編等書

黃正色字士尚無錫人嘉靖己丑進士令仁和香山  
南海所在稱神明南海霍文敏爲正色座師霍氏  
有犯一繩以法文敏以爲賢擢南臺御史首論兵  
部尚書張瓚武定侯郭勲士論避之 章聖皇太

后梓宮還葬承天護從荆山侯崔元巨璫鮑忠恬  
寵贖貨正色疏列不法狀忠等誣正色于梓宮前  
乘馬 上怒下 詔獄賴文敏力救得戍遼正色  
卽囚服荷戈趨戍所幾三十年未嘗離伍隆慶初  
復原官歷陞南太僕卿致仕歸杜門謝客觴咏自  
適卒祀遼陽三忠祠

張選字舜舉無錫人嘉靖己丑進士令蕭山仁恕廉  
明召爲戶科給事中 上遣勲臣代太廟祭選抗  
疏諫 上震怒廷杖八十三折其挺選從容曰

不懼死不可使 天子有殺諫臣名已編戶家居  
謙約退讓聚諸生說經如貧時隆慶初復原官陞  
通政司叅議致仕

王表字邦正無錫人嘉靖己丑進士選庶吉士除戶  
部主事乞改南得禮部以病自免歸部使者屢薦  
不起表爲人潔修寡合平生無他好顧好讀書竟  
老不倦所著有讀書記纂代奕稿等書若干卷子  
立道亦舉進士選庶吉士授編修未四十卒性行  
方介類其父云

人  
薛甲字應登章憲子嘉靖己丑進士授兵科給事中  
指斥方士忤貴溪謫湖廣藩幕累遷四川僉事復  
以忤分宜免歸平生殫心理學多所發明間取象  
山陽明遺書參伍之有所得所著有易象大旨四  
書口義等書

薛南字圖南武進人有志于學遍游四方謁諸聞人  
歸益深造學者多從之游性孝友蓋亦篤行君子  
也

吳元自無錫徙居武進爲人長厚好施邑大水民多

溺收遺骨千餘瘞之大風雪過養濟院摧頽諸簣  
者凍露揮金建房一百餘間歲款出穀千餘賑濟  
設粥捨棺頻歲不愆郡守趙兌以尚義旌之

潘松字惟喬宜興人篤于孝友外嚴整內不設城府  
由舉人授任丘教諭生徒貧而有志者捐俸館穀  
之擢新城令性端方不便承迎乞改教得福州率  
勵鼓舞視任丘有加焉當道嘉其醇正優以禮貌  
稱師範者必曰後齊先生云

周仕字君可武進人司徒金之長子用蔭起家累官

高州守以清謹稱陞苑馬寺少卿連章乞休始仕  
欲以蔭讓弟司徒不可將析產仕以同居之義泣  
辭之既而仕舉子三第僂舉子七咸得取給其爲  
紀綱家日落親識勸之析仕不得已哀慟累日告  
祠以食言爲罪欲以子姪十分之司徒不可析爲  
二仍割所受以益諸姪不失初意云

段鏞字子宣民之曾孫爲人孝友剛直父病疽鏞輒  
爲吮母病目鏞日爲餽姊負官責鏞傾囊代償館  
鄉塾教法甚嚴與人交不能容人過以嚴見憚然

其中豁達無他腸也

俞紹祖無錫人父貫病癱不能行倭至紹祖負貫窰  
匿倭欲殺貫號哭請代殺紹祖貫得免倭去遇老  
僕負歸鄉人憐紹祖笑之曰孝哉不愧蒿菴矣蒿  
菴者俞鎧號有孝行紹祖之曾祖也

王忱字信卿武進人早失怙家貧授徒自給既壯古  
貌虬髯繩趨矩步論議疊疊初應郡試或譏其態  
卽趨出棄制舉構一室左右圖史考正五經六書  
四聲字韻一本許氏說文稱爲精確史傳紀年朝

代名字上下數千載間歷歷如指諸掌一時有道之士咸樂與之游忱亦陶然自得也

陶澤字子沾武進人豪爽負氣能文章與薛應旂齊名爲諸生有司召弗往貢人國學司成亟問之亦不私謁旣舉應天再試禮闈不第杜門詠歌不爲干請以貧終

薛應旂字仲常武進人嘉靖乙未進士令慈溪與知府鄭不合乞改教得九江主白鹿書院歷遷南考功郎掌內計分宜憾給事中王燁令尚寶丞諸傑

貽書囑以黜燁應旂留燁黜傑被劾降建昌通判  
歷陞浙江提學副使以過執忤時調陝西兵備未  
幾罷歸應旂骯髒拔俗爲文亦磊落所著有宋元  
通鑑憲章錄浙江通誌等書子近魯內行淳備以  
居喪過毀卒

吳性字定甫宜興人徙居武進性端介舉嘉靖乙未  
進士乞爲校官得南陽卓有師模陞南京戶部主  
事改禮部兵部數請告補北則乞南以恬退受知  
當事改尚寶司丞再疏乞休得致仕舉進士二十

餘年服官不滿兩考其志尚可知已爲人不尚迂  
談不採虛譽奉先之孝教家之法事事有古先正  
風子可行中行俱進士官翰林諸孫科第蟬聯不

絕

本縣誌

蔡元銳無錫人與弟元鐸肩其父升諸屋以避倭銳  
爲賊所執殺諸塗鐸以父免未知銳死也明日持  
重貨往賊營贖兄併遇害事聞旌其門曰孝友

浦劭字成德無錫人島夷至繫其父去劭與弟濬謀  
往代途遇他夷劭遽前稱父狀貌問安在夷怒遂

殺之明日父歸又浹辰弟歸父收砌骨葬之而立  
木主于床頭每出入必呼砌曰俾兒知老人無恙  
也萬曆丙辰 詔旌

陳阿皮無錫人蚤喪父食力以養母母死鬻身營葬  
嘗墮水漁者網之得不死人謂孝感所致

高材字克甫無錫人嘉靖辛卯舉人令黃巖以鋤強  
扶弱爲事尚書黃綰家暴橫其僕至縣亦以賓禮  
人皆扼腕材執法無所徇民皆稱快又有顯者奪  
民山田民訟之材批牘尾曰一片青山一片金月

年人有萬年心海濤來必常爲限倏忽浮雲變古  
今踏遍青山山轉我問山不語奈山何若無山下  
纍纍塚料得爭山人更多其人慙而還之巖有奸  
胥作清軍偽冊材摘發杖殺胥巖民立祠祀焉孫  
攀龍己丑進士

王問字子裕無錫人嘉靖戊戌進士授戶部主事念  
父年高請改南便養尋轉廣東僉事行至桐江遂  
投劾歸父卒退居湖上屢薦不起善行草并點染  
山水人物翛然翰墨踐徑之外人爭購之

萬士亨字思通宜興人吉象子少奉父訓規行矩步  
不失尺寸嘉靖辛丑與弟士和同舉進士授戶部  
主事轉吏部操履清嚴聞父訃水漿不入口踰五  
月以積毀不起遺命以衰經殮家人從之

萬士和字思節宜興人吉仲子幼承家學有必爲聖  
賢之志舉嘉靖辛丑進士選讀中秘書閣試數冠  
其偶例得史職居恒與閣臣落落遂不得留當得  
省垣辭補禮曹旋請改南得職方會母病遂棄官  
歸服闋起南車駕調儀制出爲江西僉事久之由

督學新歷廣轄遷南京兆以副都御史督南儲轉  
少司徒改少宗伯會新鄭用事意有所不可遂自  
免江陵柄國循物望起爲大宗伯比至謬爲引重  
朱成國薨求封王江陵受其重賄士和謂非

高皇帝約持不可又有大璫爲方士乞醮壇供奉  
士和復持不可皆與江陵忤甚銜之給事中余懋  
學直言褫職士和謁江陵江陵度其有所匡救一  
揖徑出土和故緩行謂江陵曰近日處分得無太  
甚江陵色變遂謝病歸士和居官四十年凡可退

以明志辭以明節未嘗少有遲回而家居之澹泊  
里居之遜讓皆恐人所不能恐性鯁直不輕諧俗  
特其外貌和平人鮮知之嘗自言吾爲兩司始知  
實心任事卽爲真才又曰吾仕廣于人無苟取始  
識得一廉字皆真實不誑語也卒謚文恭

周罄武進人嘉靖辛丑進士爲諸生時道逢一媼以  
衣質錢爲人所紿輒以襦衫質而與之歲祲家人  
苦饑罄持課金歸道遇故人輒買棺塋之其好施  
如此累陞登州守以憂歸囊橐蕭然猶爲生時也

華雲字從龍無錫人嘉靖辛丑進士授戶部主事權  
稅九江潔已無所染請改南得兵部尋陞刑部郎  
中再疏乞休雲篤倫嗜義出于天性晚歲倣范文  
正公捐田千畝以贍族立義莊肖孝子像其中邑  
有五賢祠廓而新之增祀李忠定邵文莊名七賢  
築真休園日優游其中或偕同志放舟溪野悠然  
自得古賢達之風焉

毘陵人品目十

國朝

尤瑛

蔡瀛

王堯卿

李魁

鄒夢桂

曹三暘

子司勳

劉光濟

惲紹芳

金九成

弟九臯

丘緯

施陽得

殷旦

曹驤

黃鑿

子道

黃憲卿

吳可行

萬鵬

汪汝達

祝舜齡

趙與治

張邦定

鄒騷

孫一元

孔永芝

史元鎮

華啓直

陸南陽

徐常吉

王敬之

蔣致遠

子良

史文龍

邵秀孫

陳一麟

劉昌祚

常守文

王鑑

胡淳

周子義

王升

吳中行

趙用賢

秦柱

楊德

錢焜

俞霑

顧憲成

顧允成

錢一本

王就學

張汝治

吳瑞登

許世卿

蔣士元

子弘憲

薛敷教

張納陛

鄒學孟

丁天毓

補遺

馬應龍

唐大卿

蔡模

褚國祥

路雲龍

毘陵人品記卷十

國朝

充瑛字汝白無錫人卓犖有大志舉嘉靖癸卯鄉試  
第一人登甲辰進士嚴分宜聘修家譜不就疏請  
教授杭州稍遷國子監丞俱以廉靖文學稱進儀  
制主事大清藩府之賄尋陞廣東僉事屢擒大酋  
分宜假子饒相父私通山海寇分利瑛過梅嶺卽  
饋珍寶無筭斥去發其奸抵大辟陞江西叅議道  
卒廣民巷哭立祠祀焉子鏗以國子生選邛州判

不赴

蔡瀛字汝登無錫人家貧甚篤志好學刻自砥礪引繩而趨不失尺寸領嘉靖癸卯鄉薦錫令自下車之始一交拜無由再通聞問矣

王堯卿武進人豪爽自負以貢授鄱陽訓導陞武涉知縣恤窮辨枉節用省刑謝絕饋貽蠲除苛罰上官嘉之百事攸萃竟以勞卒于官疾革有羨餘百金仍命計吏登之籍乃瞑

李魁宜與人性篤孝父得心痛疾刲股肉和藥以進

或言惟蛸可愈遍求弗獲一日至東橋忽一蛸伏  
不動魁喜攜歸烹進之病良已又兩月父別感風  
疾而卒

鄒夢桂字汝丹無錫人嘉靖癸卯鄉薦少孤發憤自  
立不與俗浮沉祖遺負郭田悉讓弟而資館穀以  
自給屢上春官不第卒

曹三暘字子泰宜興人嘉靖甲辰進士授大理評事  
分宜以桑梓善郡邀厚賂不可卒補劇郡既巡撫  
滇南新鄭嫌其厚于塾亭以考滿不合例竟罷官

歸尋薦起官至南京工部尚書江陵奪情廷臣皆具疏留南六卿獨無疏則趙錦主之三賜贊之也子司勲字應麒隆慶辛未進士溫純恬雅官至布政三陽當陰子勲與其弟司直尤稱克讓云

劉光濟字憲謙江陰人爲人博大多厚不自峻崖岸然中實井井登嘉靖甲辰進士爲戶部郎適北虜薄都城廷議遣郎一人餉大同勤王師諸曹郎咋舌不敢往光濟奮然請行人咸壯之出守衛輝歷江西叅藩會南顧旱民聚衆競水相殺傷撫臣以

變聞 詔發兵掩捕光濟請從諭之立解散全活  
二千餘人遷太僕卿巡撫江西定賦役一條編法  
著爲令迄今各省直皆遵行之召爲南戶部侍郎  
尋改吏部遷南兵部尚書以不署保留江陵疏乞  
休歸觴奕對客酒德溫然人以王會稽白香山目  
之以嗣子爲人所構邑邑而卒

金九成字鳴韶武進人嘉靖甲辰進士爲人寡言笑  
不妄交游爲吏廉介不受私謁初令定海銳意興  
革增葺得海堤至今賴之號曰金公塘邑資海舶

奸商勢家因之爲利力爲禁革忤要路調章丘不  
爲少挫剗奸弊杜請托陞主事歸病卒九成居官  
十年妻子不免熬蘘病且革會有富家求釋罪以  
千金爲賄九成不可郡侯自抵其榻撫之曰獨不  
爲妻子殤殮計乎九成曰我躬不閱遑恤我後面  
壁臥不復語郡侯嘆息而去因捐俸助其葬第九  
阜恂恂禮讓尤稱友愛以貢爲武康知縣盡心民  
事人咸誦之

惲紹芳字光世武進人嘉靖丁未進士授刑部主事

累陞福建叅議性恒易豁達喜讀書過目輒成誦  
刻意爲古文詞自成一家言有集

丘緯字世章武進人嘉靖丁未進士知侯官有清節  
銓部計吏以緯爲第一召入以強直固守補南京  
刑部主事出守南陽貽書家人曰汝輩勿覲我位  
高祿重望豪侈也吾卽死不易不三月卒于官

施陽得字復徵無錫人性恬雅家庭以孝鄉黨以誠  
操持以廉人多稱之舉嘉靖己酉鄉試授蘭谿縣  
學教諭陞富陽知縣戶部主事

殷旦字文東無錫人嘉靖己酉鄉薦簡充方巖言笑  
不苟有子試郡縣絕無干請居喪循禮人咸稱之  
曹騭江陰人博學好古有志節父嘗爲分宜令識嚴  
相國于童子時旣得柄思報德每召騭謝不往又  
善詩賦曠達不羣樂振窮乏頗信方外服食一日  
浴竟體軟而卒

黃鑒江陰人嘉靖戊申首捐金六千兩築城後倭亂  
前後輸粟一萬石爲兵儲趙文華討倭責諸富人  
助軍興鑒復捐金七千兩鑒爲蘇州衛指揮使

萬曆間邑父老請立專祠祀之子道字吉甫任俠有父風

黃憲卿字弘度武進人嘉靖庚戌進士爲戶部郎清聲蔚起九載不調或勸之謁相嵩憲卿曰吾嫠婦也忍塗面目以取榮乎卒不往嚴氏敗始擢憲副江西年纔五十絕意仕進大都以清謹持身以儉約持家云

吳可行字子言性長子嘉靖癸丑進士遷庶吉士授檢討讀書一日五行以文學著名高視一世無有

當其意者人皆忌之竟以是罷官天性孝友復落  
拓不善治生產卽千金立盡不問也喜堪輿家言  
爲兩親卜葬地不憚屢遷謂術者曰但使吾弟姪  
受福蔭長房虧損勿論其存心仁厚尤人所難及  
云

萬鵬字汝南武進人端方峻整孤立行一意言動取  
予必稟于繩墨登嘉靖癸丑進士令松陽調新昌  
請謁無所通搏擊無所避會倭夷入犯練兵築城  
竟以勞瘁成疾卒巡按胡宗憲賻之始克殮初鵬

未屬績時有當路欲以百金助者托所知示意鵬  
推枕曰不意垂死受辱其介特如此

汪汝達字志行無錫人嘉靖癸丑進士令黃巖捐俸  
築城寇至而民不驚撫瘡痍集流亡理豪右所侵  
奪官民田給學宮以待貧士擢戶部主事遷叅議  
未幾致政歸歷官二十餘年清操皜然去浙之日  
屬吏致罰鍰曰此例所應得汝達驚曰居官自常  
俸之外尚有應得者耶竟不受家甚貧至無以供  
朝夕舉棲身數椽鬻之黃巖士民知其貧醵八十

金聞于官郵致之適遇病卒遂以爲殮

祝舜齡字壽卿無錫人嘉靖癸丑進士令政和廉介  
絕人吏事精敏擢南部主事卒囊金不贏兩至無  
以殮

趙與治字道隆江陰人嘉靖癸丑進士知曹州以廉  
介稱時分宜擅權納賄與治人覲無所饋調廣安  
六年不遷後移襄陽郡丞擢戶部郎尋轉兵部丁  
母憂遂不復謁補家徒壁立終身布衣蔬食往來  
鄉城間野水孤航一平頭相隨不知其爲官人也

無子年八十八而卒產薄不能具喪葬兵憲蔡公  
經紀之銘其墓

張邦定武進人嘉靖乙卯倭亂爲義官練鄉兵以禦  
之與倭戰鄭陸橋手刃數倭馬躡被執截髮逼降  
不屈遂遇害郡守金公哭之慟唐中丞吊之曰生  
爲百夫雄歟爲壯士規

鄒駭字道弘武進人幼喪父廬于墓刻木肖之以奉  
母病刲股後以貢監官臨海丞九年陞雄縣知縣  
以清謹聞積贖銀千餘金封庫致政歸民立生祠

祀焉

孫一元字虞允無錫人天性孝友嘉靖辛酉魁鄉書  
三上春官不第意度瀟洒磊落不群爲文辭數千  
百言立就未仕卒

孔未芝靖江人篤于倫理父病憂劇忽有醫來曰此  
須兒女肉製藥則愈未芝入密室割左股肉授醫  
製藥父服之疾果愈醫忽去莫知所向

史元鎮宜興人年十六家失火欲投火救母隣人阻  
之元鎮號泣突入與母俱焚火熄見其兩手與母

相握猶未釋也時人傷之立像祀于周孝侯廟

詔旌其墓

李啟直字禮成無錫人嘉靖壬戌進士爲刑部主事  
時海忠介公言事忤 旨逮繫啓直持護甚力疏  
請改南陞武選郎秉政不阿出守永州歷陞叅政  
以端樸弗諧于時遂乞歸家居十餘年足跡不至  
城府有司踵門自通多謝罷遠近仰其清節

陸南陽字伯明武進人爲諸生工於制舉著爲講義  
人傳習之以貢授湖廣善化知縣廉介自守治邑

如家久之倦游遂拂衣歸疾且亟援筆書數語曰  
生無愧行必無愧衾存吾順事歿亦吾寧遂卒

徐常吉字士彰武進人家貧藉館穀養母嘉靖甲子  
舉于鄉絕迹干請貧益甚署教上海癸未成進士  
授中書舍人選南戶科給事管湖冊號稱脂膏之  
地不一染指第令諸胥錄書數百卷而已平生下  
帷攻苦寤寐詩書薪水之餘輒以攻鐫刻所著有  
四書原旨詩翼說遺經四解六經類雅等書性喜  
飲與知己相對陶然乃已不設城府鄉人子弟多

從之游時有啟發稱做弦先生官止浙江僉事

王敬之字慎中武進人性孝母構危疾刲股得愈嘉靖甲子領鄉薦謁選都昌以王官歸

蔣致遠字汝靜武進人少淳篤長益修飭見二程書慨然有求道之志子弟貴顯絕無所憑藉敝屋薄田泊如也嘗曰不伎不求平生得力在此四字自知卒日盥櫛危坐而逝子良鼎字定卿萬曆己丑進士四爲縣令所至見德卒于官自孝廉以及從宦田廬不改其舊亦近世所難得者也

史文龍字應霖武進人嘉靖壬戌進士官太守居鄉循牆而走有長者之風兒童市人咸睽就之不知其爲二千石也

邵秀孫字元芝宜興人性孝友尤嚴於義利教授生徒斤斤矩矱不踰尺寸少穎慧詞翰並美爲督學所賞拔婁試不第晚以歲薦所給傳金分惠宗族亦足覘其雅志云

陳一麟字曰仁武進人少爲諸生甘貧好學一室蕭然嘗自郡試不肯干謁兢兢自守言動悉遵矩矱

晚歲究心理學得其大旨邑庠知其貧助之粟力辭不受士論高之

劉昌祚字子延武進人性狷介不能隨俗爲諸生屢試優等邑令器之昌祚嶙然不染也謁選時以貌置丞簿間選司見其文亟稱之遂授雩都知縣以廉稱

常守文字以通武進人由吏員任成都衛幕以清慎薦陞廣西副提舉再任廣東一介不取丁母憂助喪無所受歸途鬻衣克費竟以貧困歿

上鑑字汝明問之子嘉靖乙丑進士知武定州州苦  
養馬請以銀代省費無算州有商稅括其贏募流  
民給牛種令懇草田自食逃亡漸復擢戶部員外  
郎調吏部念父老遽引疾歸有召命俱不拜年三  
十二喪偶不復娶設榻父傍朝夕依依爲孺子戀  
父歿以原官名陞尚寶卿轉南鴻臚卿引年加太  
僕卿致仕鑑冲夷恬粹平居無疾言遽色貧窶者  
叩之無不應聞有冤抑輒走白于有司人亦信其  
無他也

胡濬字原荆無錫人嘉靖乙丑進士爲令平恕近民  
訟廣稀簡持身清約如寒士召拜御史首論太監  
溶直聲大震會紅星犯垣復疏有高宗不君則天  
爲虐等語上怒罷爲民居家不修邊幅性好客  
縱游山澤間或勸其斥買田產爲子孫計則不應  
卒之日遺通千金

周子義字以方無錫人嘉靖乙丑進士改庶吉士授  
編修陞南國子司業張江陵奪情議起南中九列  
業具疏留子義獨不署名江陵沒始徙官歷陞吏

部侍郎子義木訥寡言笑踣矩履繩不失尺寸居  
官默然自守無所左右所著有中書直閣記國朝  
故實等書卒贈禮部尚書謚文恪子炳謨甲辰進  
士亦官翰林

王升字世新宜與人少孤奉母以居偶從友人飲母  
有愠色終身不御酒從萬古齋游及羅念菴王龍  
溪之門上下討論多所領受自守繩墨益嚴胡總  
督宗憲延爲上客會有失律者于法當論死遣幕  
客邵生諭意以千金爲壽升曰其人罪死死之由

法可以生生之由總戎何潤王生爲已而以歲薦  
司訓京兆邵生從在新鄭惟中謂升曰相君欲重  
用子一見何如升謝不應久之遷國子學錄江陵  
柄國欲網羅天下名士託友人道意行典制敕升  
亦不應出倅成都有廉舉遷鹽課提舉遂掛冠歸  
日與戚故論道談學從容竟日而已所著有四書  
輯畧讀左贅言等書

吳中行字子道性之仲子隆慶辛未進士選庶吉士  
授編修萬曆丁丑十月彗星見會張居正有父喪

矯制奪情廷臣交章保留中行不勝憤因星變  
陳言上植綱常明大義疏言婉而刺居正怒甚擬  
旨杖六十罷爲民治創潞河聞母訃嘔血數升創  
盡裂遍奔廬墓下不復入城市居正歿詔起原  
官尋晉中允累遷諭德補日講官會御史丁此呂  
奏科場諸不法狀冢宰楊巍叅斥此呂言者閔起  
閣部大臣佯托疾求去廷臣爭疏保留如居正時  
中行又不勝憤復上尊主權明臣義疏語甚激切  
人皆側目中行四疏乞歸久之以薦起侍讀學士

掌南京翰林院事復三疏稱疾辭免未幾病卒易  
簀時作自輓詩四章正衣冠危坐而逝中行長身  
玉立兩目炯炯氣雄萬夫不容迫視與君子處肝  
腸立見與小人處顏色盡赤令之無所容故君子  
知之而小人不無忌之者家居遇歲侵捐貲設糜  
饑民多所全活鄉人德之所著有賜餘堂集節縣誌  
趙用賢字汝師先世爲宋宗室有士鵬者守江陰軍  
因家焉後徙常熟用賢少有才名登隆慶辛未進  
士官翰林檢討丁丑江陵不奔喪臺省保留用賢

抗疏言奪情非法宜聽還守制會同年吳編修中行疏先入同日奉旨杖六十編氓癸未召復原官晉中允時遷人輻集議論盈庭欲反江陵政甚切滿朝積不能堪羣小滂言黨議遂起用賢疏極言朋黨之禍與吳編修俱乞歸不允後晉洗馬祭酒累官吏部侍郎駸駸柄用忽中讒歸則妻江尼之也

秦柱字汝立端敏公孫嗜學工文詞精楷隸爲諸生有聲詔選中書舍書朱希孝爲柱中表遞列其

名而後召之重其材也桂先世與相新鄭有交未  
嘗數數其門及新鄭爲江陵所傾禍不測門下士  
皆引去桂特遠將之江陵父歿不奔喪同郡吳中  
行抗疏杖闕下以身後事相託桂挾醫調護得  
不灰江陵銜之斥爲王官復中以考功法桂欣然  
棄官歸家日貧終其身無抑鬱之意蓋慷慨節俠  
古烈士不是過也

楊德字本明武進人少純謹登辛未進士令永康却  
金斥羨不苟取予轉辰州同知未離永康卒檢其

索遺俸七金而已

錢焜字韞章宜興人舉萬曆癸酉鄉薦官兵部司務  
清慎恭飭絕無私于齋餉金數十萬往宜雲有積  
羨却不入垂橐而返會職方推用西寧徇私忤  
旨職方以故相子有內援得免竟謫兩司廳焜得  
慈利學博未幾投牒歸與二三同志結社爲會恬  
然自得也嘗以三不識自許謂誠心直道不識人  
世有機械事淡食敝衣不識人世有嗜好事委心  
任運不識人世有徑實事人亦共許之

俞霑字時澤宜興人坦夷純厚無表暴無城府望而知其爲有道仁人也登萬曆丁丑進士司李台州以廉靜著聲遷南吏部主事擢大名兵備念親老乞休歸後以薦起山東江西皆不赴優游林居者十餘年與諸名流以學相切劘待親黨依于厚鄉人至今稱之

顧憲成字叔時無錫人幼沉毅穎敏十六下帷攻苦榜其齋曰讀得孔書方是樂縱居顏巷不爲貧以見志萬曆丙子舉應天第一庚辰成進士授戶部

主事視時政紕繆憤不能平擬上書申相國見南  
樂魏允中漳浦劉廷蘭二君書稱善遂附名進江  
陵聞而側目江陵病傾國走羣望禱署憲成名馳  
騎削之江陵卒調吏部丁亥大計有糾何尚書起  
鳴者與辛中丞自修相訐憲成上疏詆尚書語侵  
執政謫判桂陽州量移處州司李丁母憂補泉州  
壬辰大計舉清廉寡慾第一仍晉吏部時妻江再  
執政有 三王並封之議憲成首疏力爭與妻江  
往覆辨論侃侃無所回互議乃寢癸巳大計高邑

趙南星司功盡黜要人子弟媼姪憲成實左右之  
執政快快趙忽奉 旨罷憲成願與同罷不報已

領銓事凡啓事與海內意所欲用者執政色沮不  
欲用而執政所欲用冢卿及內閣復尼不行久欲  
中之以時望所屬不果乘部推內閣起王山陰遂  
削籍歸杜門卻軌益潛心理學城隅得楊龜山先  
生東林故址闢書院與同志闡繹濂洛正脉其說  
以性善爲本體小心爲工夫歲有劄記沉潛粹密  
與讀書錄相表裏問學者日益衆戊申起南光祿

少卿堅臥不出卒于家學者稱爲涇陽先生

顧允成字季時憲成之弟萬曆丙戌進士時海忠介瑞爲御史房震所詆公發憤與同榜彭遵古諸壽賢合疏諍之削籍歸後以薦起南康教授丁母憂補保定陞國子博士尋陞禮部主事有 詔封三王衆議洶洶與樂元聲張納陞合疏諍之不報已趙考功主計秉公執政逐之復與陳泰來賈岩于孔兼薛敷教張納陞各疏諍之甚力謫判光州會涇陽先生倡東林之會允成從之參驗身心究

極性命之學性尤潔廉嚴取予謫所積俸先後中  
丞遣致之堅辭不受曰吾敢以在假尸祿乎嘗輯  
朱子無極王伯二大辨及論治道者爲惟此四字  
編擬獻之朝不果年五十四卒

錢一本字國端武進人萬曆癸未進上令廬陵以興  
起斯文爲已任建王文成祠并祀鄒文莊諸公延  
禮名碩倡明理學擢御史首疏糾前按臣貪黷不  
法得旨逮戍衆爲赫然按廣西上建儲論相二  
疏語多觸忌諱留中三月因杖給事孟養浩連及

削籍爲民歸里杜門絕跡不入公府郡守歐陽公  
建先賢祠傍構經正堂講學共推爲主時梁溪有  
東林書院顧公憲成主之遞相往來聯合同志生  
平無他玩好終日兀坐手不停披尤潛心易學鑽  
研卦象著像象管見盡脫前人傳註又以書九疇  
數衍爲四千六百八爻爻有辭有象占驗吉凶爲  
範衍十卷廣大微密非俗儒所能究他如類取古  
今儒學正脉作源編匯編又手錄時政大要爲邸  
抄間出心得勉人學問爲崑記倡里中同壽同善

會性最方嚴又最和坦居恒角巾布素混野峻無  
別勸後生學發乎至誠規人過若恐傷之意向稍  
善百方誘進之有急難公憤直之又私全救之所  
謂廉而不劌和而不流者也先知卒日預營兆域  
自作寄寓通客誌及長言若干首皆永訣辭世語  
至期果翛然而逝其了了于生歟之際如此

王就學字所敬武進人萬曆丙戌進士授戶部主事  
管驗糧中官需索橫甚就學稱引祖制抗議得  
請著爲令以禮省提調禮闈裁一切冗費調吏部

苞直無所入銓曹爲之一清會考功郎缺次當及  
竟他屬蓋就學性嚴冷門無尺紙通衆咸側目所  
規條多不便人私復不能少抗曲徇人意忽奉  
內旨考察吏部諸司黜爲民時所黜者皆當途所  
忌也歸不半載卒人皆惜之

張汝治字堯敷武進人以貢司訓長興時武進令爲  
長興人其子弟爲門下士五載未嘗投一刺里中  
有豪觸法索百金求援嚴謝不應人以爲難

吳瑞登字雲卿武進人性淳厚爲諸主熟于講授尤

勤著述以貢授光州訓導薦入六館續修憲章錄  
大學衍義補獻

闕下校讐繕錄焦勞致疾而

終

許世卿字伯勲無錫人家貧有志操爲諸生有聲受  
知郡邑絕不干以私萬曆乙酉舉于鄉蕭然自守  
揭安貧省事十戒于壁皆習俗所易蹈者書以自  
警且以警世五上春官不第念母老遂謝公車并  
辭傳金杜門益堅敝廬數椽僅蔽風雨怡然自適  
蓋亦古所稱獨行之士也

蔣士元宜興人孝友淳篤力行古道舉嘉靖甲子官  
兗州同知有德政祀名宦子弘憲字成甫素性端  
方刻意砥礪卽一步趨若履繩尺舉萬曆乙酉官  
戶部主事權關河西多所興革廉慎不染商民德  
之以勞瘁卒于官祀武清名宦人稱蔣氏兩賢大  
夫云

薛敷教字以身武進人萬曆己丑進士會南御史王  
藩臣上疏不自憲長都御史吳時來叅之敷抗  
疏詆時來盡喪生平并侵執政有平津曲學金陵

險陂之語座師許國以貢舉非人自劾勒令回籍  
後以薦起鳳翔教授陞國子助教有 詔並封  
三王抗疏不報趙司功主計被逐復抗疏謫光州  
學正歸從東林講學苦自刻勵垢衣糲食有窮士  
所不堪者一切饋遺卻不受

張納陛字以登宜興人萬曆己丑進士授刑部主事  
尋調禮部有 詔並封 三王與樂元聲顧允成  
合疏爭之已復與陳泰來等疏掾趙考功謫判鄧  
州歸從東林講學林居十九年屢薦不起郡縣事

有關利害直言之不少遜杜門讀書或爲詩歌旁  
及書畫皆有法

鄒學孟字正之武進人端謹溫雅內行淳備家庭尤  
極友愛萬曆庚子舉于鄉絕不干謁郡守歐陽公  
知之因其疾饋醫藥之資重其品也一舉而卒人  
甚惜之

丁天毓字秀夫宜興人性耿介取予甚嚴爲諸生有  
名守令不識其面爲孝廉邑侯雅重之絕無干謁  
登萬曆辛丑進士令金谿六載有惠政纖毫不染

擬授御史候 命卒于京貧不能殮諸年友助之  
其子若孫家徒壁立不能畢婚娶蓋志行卓然真  
清白吏也

補遺

馬應龍字文徵武進人舉嘉靖辛酉鄉薦令弋陽有  
善政居家孝友撫庶弟有恩晚歲偕同志修講學  
廣仁會捐貲施耨不憾與人坦直和易心有不可  
義形於色郡誌有朱愜者持論侃侃不阿邑非徒  
爲愿人也良辰美景吟弄風月有逍遙之致壽八

十三無疾而終蓋稽未久士論已定亟宜補錄以式鄉閭

唐大卿字子弘武進人舉隆慶丁卯鄉薦樸茂醇謹有無懷葛天之風令靖安倅青州皆以廉靖自守歸橐蕭然田舍無所增益郡縣亦未嘗有干請其和而介如此

蔡模字子範武進人性淳篤不設城府與人交如春風襲人生平無一鑿天理逆人心傷元氣之事先人故廬悉推以予諸弟孝友蔚聞舉萬曆己卯鄉

薦令淳安銳意興革如直闖錮弊積百餘年一旦  
剷除省民間供億以萬計與郡守不合左遷藩理  
民有去思焉

褚國祥字徵興武進人萬曆庚辰進士令寧化以才  
調浦城清操皦然不滓會失上官意遷吳興丞以  
母老乞終養歸戲綵牋下依依有孺子之愛後補  
兗州治河曹南河大決行河使者委咎於丞議調  
遂棄官歸居鄉坦率樂易酒鎡茗椀與故舊相過  
從陶陶自得也恬于榮進甘心澹薄人尤稱之

路雲龍字伯際宜興人萬曆庚辰進士宅心和粹凡事依于仁厚嘗遊萬文恭之門見其質行雅重之居家孝友兄弟白首同寢食無間言筮仕蘄州由度支郎出守建昌永州所至有惠政備兵黔南征播有功擢江右大叅竟以黔南勞瘁卒于官人共惜之